


Un siman exitoso di actividadnan publico

Museo Arqueologico Nacional a duna un bista di locual e tin di ofrece



ORANJESTAD (AAN): Den cuadro di apertura di Museo Arqueologico Nacional a tene diferente actividad pa publico cera conoci cu e facilidadnan nobo di e Museo.

Hobennan entusiasta a participa na un programa di vakantie cu e topico di e prome exposicion temporario esta 'Rancho' y tambe a asisti na un workshop tocante 'kraalchinan' Amerindio y esnan contemporaneo bou guia di arqueologo dr. Marlene Linville y artista Marian Abath.

Presentacion di e buki 'Toen Indianen op Aruba Woonden,...', e prome publicacion di Museo den su bachi nobo, a atrae mucha y mayornan pa tende e storia di 'Budui' y hasi un workshop di pintura cu sra. Ria Arindell. E prome charla durante ora di almuerzo tabata un exito total caminda e Café Cultural di Museo a yena cu interesadonan pa e charla di arqueologo Dr. Aad Versteeg y pa saborea un dushi plato di cuminda Surinam.

Locual sigur tambe tabata un grato experiencia pa un y tur tabata e anochinan di Café Cultural. A habri cu un charla di arqueologo drs. Harold Kelly y musica experimental riba material di reciclahe door di Jair Britten y Jerry Lopez. A sigui un anochi sumamento ameno cu presentacion di 'Ceque' y autor di e prome edicion esta drs. Eduard Drescher. E anochi aki a organiza tambe un quiz na



cual a participa 7 grupo, resultando como ganador e grupo 'Tortuga Seco'. Pa clausura di Café Cultural a dedica un anochi na e barío di 'Rancho'. Ryan Oduber a duna un presentacion di su vision futuristico digital di e barío aki, un trabao cu a ser ricibi cu un gran aplauso pa e publico forma pa hopi antiguo y actual habitantenan di e barío. Sra. Caresse Issings, recitando un escrito propio, a percura pa tur presente ser transporta pa e epoca di su infancia den e mansion di su abueolonan Ecury. Grupo los

Gavilanes a entretene publico cu aparicion special y hopi aprecia di e conocido Piet de Cuba y e 'open-mike' a permiti varios persona conta nan experiencia y storianan di e barío.

Museo Arqueologico Nacional ta desea di gradici tur su sponsors, voluntario, colaborador y trahadornan cu a duna un gran aporte na exito di e siman di inauguracion. Alavez ta recorda publico cu museo ta habri di diamars pa diadomingo di 10'or pa 5'or di atardi y cu te fin di Augustus entrada ta gratis.

Telefonan di DIARIO
582-6747 / Fax: 582-8551